



Quatter da set medaglias olimpicas van en la Rumantschia: Sandro Viletta (aur), Dario Cologna (duas giadas aur) e Selina Gasparin (ina giada argient) (da san.).

FOTOS KEYSTONE

Rumantschia en fevra da medaglias

Trais Rumantschs han fatg furori als gieus olimpics

DA GIUSEP VENZIN / ANR

■ **Trais Rumantschs ladins han scrit il venderdi passà istorgia da sport.** Dario Cologna da la Val Müstair ha gudagnà en la cursa da 15 kilometers stil classic la segunda medaglia d'aur a Sotschi e Sandro Viletta da La Punt-Chamuesch ha gudagnà surprenden-

tamain la medaglia d'aur en la cumbinaziun da skis. Istorgia svizra da sport ha scrit Selina Gasparin da S-chanf il medem di cun il segund plaz en ina concurrenza da biatlon. La giuvna da 30 onns è l'emprima che gudogna ina medaglia da biatlon per la Svizra als gieus olimpics.

Tenor la statistica dal 2012

resda in mez pertschient da la populaziun svizra rumantsch. Dals 163 atlets tramess als gieus olimpics èn passa diesch pertschient da lingua rumantscha e dals victurs svizzers da medaglias duas tiarzas. Ulteriuras medaglias astgan ins anc spetgar dals sportists rumantschs oz da Selina Gasparin en la cursa da 12,5 km

da biatlon e mesemna en la cursa da sprint classic cun ils dus frars Dario e Gianluca Cologna a la partenza. La curuna da la cursa lunga spetga il davos di tar la cursa da 50 kilometers en il stil liber ed il favorit è il Rumantsch – numnadamain Dario Cologna.

A Sotschi han ulteriurs sportists rumantschs procurà per ex-

cellentas prestaziuns. Malgrà fastidis cun il dies ha cuntanschì Sina Candrian da Flem cun il snowboard en la disciplina slopestyle il quart rang. Ier han ils trais Rumantschs Curdin Perl, Jonas Baumann e Toni Livers cuntanschi ensemen cun Remo Fischer en la staffetta da 4x10 km il settavel rang ed il diplom olimpic.